

Nuwe Lied Bediening

En Hy het 'n nuwe lied in my mond gegee, 'n lofsang tot eer van onse Elohiem (Ps. 40:4)

E-pos: kontak@nuwelielied.info
 Webwerf: <http://www.nuwelielied.info>

Parashah 48: *Shoftim* (שֹׁפְטִים) Regters; *Judges*

Jy moet regters en amptenare aanstel in al jou dorpe wat יהוה jou God, jou gee volgens jou stamme en hulle moet die volk oordeel volgens 'n regverdig oordeel. Deut. 16:18 – PWL¹

Torah : Deut. 16:18 tot 21:9.

Haftorah: Jes. 51:12 tot 52:12.

Hernieude Verbond:

- ❖ **Matt. 18:15 tot 20; Joh. 8:17; 1 Kor. 6:1 tot 8; 2 Kor. 13:1; Heb. 10:28 tot 31** – In die mond van twee of drie getuies.
- ❖ **Matt. 5:38 tot 42** – Vergifnis en vergelding.
- ❖ **1 Kor. 5:9 tot 13** – Torah-ongehoorsame gemeentelede.
- ❖ **Hand. 14:23; Titus 1:5; Ef. 2:22; 4:11** – Leierskap in die gemeente.
- ❖ **Hand. 7:35 tot 53; Hand. 3:13 tot 26** – Die eerste en die tweede Moses.
- ❖ **1 Tim. 5:17 tot 22; 1 Kor. 9:6 to 14; Gal. 6:6** – Ondersteuning aan die evangelie bedieninge.

Hierdie notas is aanvullend tot die vorige notas vir Parashah 48 wat afgelaai kan word by: [Parashah48Notas.14](#) of deur dit aan te vra by kontak@nuwelielied.info.

It is not the greatness of our troubles as the littleness of our spirit, which makes us complain
 – Hudson Taylor.

Whenever evil wins, it is by moral failure of those who compromise basic principles – Ayn Rand. History is replete with examples of entire nations weakened by compromise and moral failure.

Beware of false knowledge; it is more dangerous than ignorance – George Bernard Shaw

¹ PWL Vertaling (Pad van Waarheid tot die Lewe) kan gratis afgelaai word by www.padwlewe.ch: of kontak vir Gerrie Coetsee by padwlewe@yahoo.com

Midrash (Torah Bespreking)

Gehoorzaamheid en Liefde

Wanneer ons die Torah, naamlik die eerste vyf boeke van die Skrifte, asook die Skrifte in geheel bestudeer, moet Yeshua Messias die fokus van ons studie wees en nie YHVH se wette (gebooie; *mitzvot*) nie. Ons moet Yeshua se woorde onthou toe Hy gesê het:

Maar as julle Moses geglo het, sou julle My glo, want hy het van My geskrywe. Joh. 5:46.

Paulus het hierdie woorde van Yeshua bevestig toe hy aan Timotheus die volgende geskryf het:

*Bly jy egter in daardie dinge wat jy geleer het en waarvan jy seker is omdat jy weet van wie jy geleer het en omdat jy van kindsbeen af die afgesonderde Geskrifte geleer is wat jou wys kan maak tot die Lewe in die vertroue van Yeshua, Die Gesalfde Een. 2 Tim. 3:14 wn 15 –
PWL.*

Yeshua Messias is in Torah verskuil, maar ons kan soveel klem op gehoorzaamheid aan YHVH se opdragte lê dat ons Yeshua van Torah mis. Te veel klem op pogings tot gehoorzaamheid kan ons vreugde van vrygespreek van ons sondeskuld in Yeshua ontnem.

Ons moet die balans vind tussen YHVH se genade soos in Yeshua aan ons geskenk is en gehoorzaamheid aan YHVH se onderrig en instruksies. Sonder hierdie balans kan ons, soos die Fariseërs, die wet vereer in plaas daarvan om Yeshua Messias, die Lewende Torah, te vereer. Dan verdwyn ons vreugde in die genade van sondevergiftig in Yeshua en word dit met wetsverering vervang (wettiesheid; *legalism*).

Ons moet altyd onthou dat Rabbynse Judaïsme nie die vreugde van sonde vergifnis deur vertroue in Yeshua as die Lam van God ken nie. Daarom plaas Rabbynse Judaïsme die klem op gehoorzaamheid aan Torah en behels hulle verwagting van Messias slegs 'n fisiese bevryding en oorwinning oor hulle vyande wat gepaard sal gaan met die vestiging van 'n koninkryk soortgelyk soos die van Dawid.

Hierdie verwagting koester Rabbynse Judaïsme sedert Yeshua se eerste koms. Daarom was die meerderheid verblind vir die geestelike bevryding van sondeskuld wat Yeshua se folterdood bewerkstellig het vir elkeen wat in Hom glo.

Gevolgtlik is Rabbynse Judaïsme blind vir die verandering in die Torah ten opsigte van ondermeer die priesterskap en offerandes wat met Yeshua se folterdood en opstanding ingetree het.

As daar dan volkomenheid deur die Levitiese priesterskap was – want met die oog daarop het die volk die wet ontvang – waarom was dit nog nodig dat 'n ander priester moes opstaan volgens die orde van Melgisédek en dat hy dit nie volgens die orde van Aäron genoem word nie? Want met verandering van die priesterskap kom daar noodsaaklik ook verandering van wet. Heb. 7:11 en 12

Die gevaar bestaan dat ons so bekoor kan raak deur die wysede van Rabbynse Judaïsme dat ons ook verblind kan word vir hierdie waarheid van die verandering in YHVH se Torah wat van toepassing geword deur die eenmalige offer van Yeshua tot sonde vergifnis en vertroue tot wedergeboorte. Hierdie geestelike blindheid het dikwels tot gevolg dat gelowiges van die nuwe verbond uiteindelik Yeshua as Messias verloor en Rabbynse Judaïsme aanhang.

Daarom: Ons moet versigtig wees vir Messiaanse Judaïsme – Vermenging van vertroue in Yeshua met Rabbynse Judaïsme (waar die Rabbies en Talmud die hoogste gesag het).

Dit is ook belangrik dat gehoorsaamheid aan Torah altyd weens liefde vir YHVH en vir medemens moet wees en dat dit altyd ‘n vreugde moet wees. Genade van vergifnis van oortreding van Torah (die wet) moet altyd ons vreugde van Torah-gehoorsaamheid wees.

A huge error of Torah obedience is when we exalt our sacrifices of obedience over love and compassion.

Ons moet Yeshua se antwoord aan ‘n kenner van die wet onthou toe Hy gesê het:

Jy moet יהוה, jou God, liefhê vanuit jou hele verstand, wil en emosie, vanuit jou hele gees, vanuit al jou kragte en vanuit al jou verbeelding en begrip. Dit is die eerste en grootste opdrag en die tweede, wat net soos dit is: jy moet jou naaste liefhê net soos jouself. Aan hierdie twee opdragte hang die hele Wet en die Profete.” Matt. 22:37 tot 40 – PWL.

Liefde is die “gordynreling” waaraan die Torah en die Profete hang! Sonder liefde mis ons die gees en die doel van die Torah en die Profete! Sonder dankbare vreugde vir die genade van vergifnis en versoening deur Yeshua, mis ons die ware betekenis van YHVH se liefde vir ons!

YHVH se Regeringstruktuur

Dit is YHVH se wil dat Sy volk ‘n regeringstruktuur in plek moet hê wat volgens Torah sal verseker dat alles welvoeglik en ordelik in die gemeente (samelewing) sal geskied. Met so ‘n regeringstruktuur in plek, en een wat effektief funksioneer, kom die vermoë vir Israel om oor ander volke ook te regeer! Dit is YHVH se wil vir Sy volk in die eindtye.

Die heerskappye en die grootheid van die koninkryk onder die ganse hemel sal gegee word aan die afgesonderde volk van die Allerhoogste, wie se Koninkryk ‘n ewige koninkryk is en al die heerskappye sal Hom dien en gehoorsaam. Dan. 7:27 – PWL.

In hierdie parashah, *Shoftim*, verduidelik Moses die breë beginsels van die oppergesag (die gesagstruktuur; regeringstruktuur) wat Israel moet regeer. Hierdie gesagstruktuur moet uit regters (*shoftim*) en opsigters (amptenare; *shotrim*) in die poorte (stede) van elke stam bestaan. Die regters is diegene wat Torah moet ken om dit korrek te kan interpreteer (verklaar; “reg sny” – 2 Tim. 2:15) en om onpartydige uitspraak te kan lewer, terwyl die opsigters (amptenare) moet toesien dat die beslissings (uitsprake) van die regters uitgevoer word.

Regters en opsigters moet jy vir jou aanstel in al jou poorte wat YHVH jou God jou sal gee volgens jou stamme; en hulle moet die volk oordeel volgens ‘n regverdige regspraak (Deut. 16:18)

Wanneer Israel die Beloofde Land in besit neem, sal ‘n koning, wat deur YHVH aangestel word, oor hulle heers.

Wanneer jy in die land, wat יהוה, jou God, jou gee, kom, dit besit, daarin woon en dan sê: ‘Ek wil ‘n koning oor my aanstel soos al die nasies wat rondom my is,’ dan moet jy ‘n koning wat יהוה, jou God, sal kies, oor jou aanstel; een vanuit jou broers moet jy as koning oor jou aanstel; jy mag geen buiteland, wat nie jou broer is, oor jou aanstel nie. Deut. 17:14 en 15 – PWL.

YHVH se regeringstruktuur is dus 'n koning wat regeer by wyse van regters en opsigters wat die uitvoerende gesag van die koning is.

Die geheelprentjie van die gesag- en regeringstruktuur van Israel, volgens ons Torahstudie tot op hede, bestaan dus uit die volgende: 'n Koning, regters, opsigters, priesters en profete. Hierdie is YHVH se bloudruk van wat was en van wat sal wees. Die vraag is dus hoe hierdie strukture onder die nuwe verbond funksioneer?

Eerstens moet ons verstaan dat Yeshua is ons Koning (Matt. 2:2 en 6; Miga 5:1), asook Ewige Hoëpriester volgens die orde van Melgisedek (Heb. 7:11 tot 17).

Tweedens moet ons verstaan dat die Levitiese priesterorde deur die priesterorde van Melgisedek vervang is. Wanneer die apostel Petrus ons herinner dat ons 'n gekose nasie is wat as priesters in die Koninkryk dien (1 Pet. 2:9) dan is dit met verwysing na die Koninkryk van Yeshua en die Melgisedek priesterorde.

Julle is 'n gekose nasie, om te dien as priesters in die Koninkryk, 'n afgesonderde volk, bymekaargemaak en bevry, om die lofprysing van Hom, wat julle uit die duisternis geroep het, te verkondig tot Sy wonderlike lig, julle wat vroeër geen volk was nie, maar nou die volk van God is; vir wie niemand omgee het nie, maar nou word omgee oor julle uitgestort.

1 Pet 2:9 en 10 – PWL.

Die Levitiese priesterorde het hulself 'gediskwalifiseer' toe hulle Yeshua as Messias verwerp het. Op die wyse is die profesie in Ps. 118:22 en 23 vervul soos Yeshua dit ook bevestig het:

Yeshua sê vir hulle: "Het julle nooit in die Skrifte gelees nie: 'Die Steen wat die bouers verwerp het, dit het die Hoof Hoeksteen geword. Hy het van die Teenwoordigheid van יהוה gekom en is wonderbaar in ons oë?' Deur dit sê Ek vir julle: 'Die Koninkryk van God sal van julle weggevat word en aan 'n volk gegee word wat vrugte sal dra en wie ook al op hierdie Steen val, sal stukkend breek en elkeen op wie Hy val, dié sal tot poeier gemaal word'. Matt.

21:42 tot 44 – PWL.

As gevolg hiervan het Rabbynse Judaïsme vandag geen tempel nie, want Yeshua Messias het die Hoeksteen geword van 'n lewende geestelike tempel!

Julle is daarom nie meer vreemdelinge en besoekers nie, maar inwoners van die Stad van die Afgesonderde Een en kinders van die familie van God. Julle word opgebou op die fondasie van die afgevaardigdes en die profete, met Yeshua, Die Gesalfde Een, self die Hoeksteen van die gebou. In Hom word die hele gebou aanmekaar gesit en dit groei tot 'n afgesonderde tempel in eenheid met יהוה terwyl julle ook vir Hom gebou word tot 'n blyplek van God in die Gees. Ef. 2:19 tot 22 – PWL.

Ons is die priesters volgens die orde van Melgisedek wat in hierdie lewende geestelik tempel dien en met Yeshua as ons Ewige Hoëpriester.

Yeshua is die lewende steen wat deur die mense (Rabbynse Judaïsme) wel verwerp is, maar by God uitverkore en kosbaar is (1 Pet. 2:4). Daarom laat ons ons ook soos lewende stene opbou, tot 'n geestelike huis, 'n afgesonderde priesterdom, om geestelike offers te bring wat aan God welgevallig is deur Yeshua Die Gesalfde Een (1 Pet. 2:5).

Soos reeds genoem is die Levitiese priesterorde met die Melgisedek priesterorde vervang omrede Rabbynse Judaïsme Yeshua verwerp het. Aangesien daar altyd 'n priesterorde diens moet doen in YHVH se Koninkryk, en omrede die Melgisedek orde nie 'n fisiese tempel het

nie, en ook nie die offers van die ou verbond bring nie, was dit noodsaaklik dat daar 'n verandering in die wet moes kom (Heb. 7:12).

Hierdie verandering in Torah is nie 'n probleem nie, want beide die Melgisedek en Levitiese priesterorde is deel van Moses se Torah. Daarom is die Torah in wese nie verander nie! Dan moet ons ook onthou dat daar slegs een Wetgewer is (Jak. 4:12) wat Torah mag verander en dit is YHVH – die gewer van Torah!

Aangesien die onderrig en instruksies vir die priesterorde van Melgisedek verkil van die van die Levitiese orde, moet ons vra: Wat is die onderrig en instruksies (Torah) vir die Melgisedekorde?

Eerstens het ons in Efes. 2:20 gelees dat YHVH se Koninkryk van die nuwe verbond gebou word op die fondasie van die afgevaardigdes (apostels) en die profete, met Yeshua, Die Gesalfde Een, self die Hoeksteen van die gebou (Koninkryk).

Tweedens moet ons verstaan dat die dissipels (die studentevolgelinge) van Yeshua 'n verenigde priesterorde moet vorm om die geestelike Koninkryk van YHVH te vestig.

Met bogenoemde in gedagte gee Efes. 4:11 tot 16 vir ons insae in die Torah vir die priesters (dissipels) van die Melgisedekorde.

En Hy het sommige as afgevaardigdes, sommige as profete, sommige as boodskappers van die goeie boodskap en sommige as herders en sommige as leermeesters gegee, om die afgesonderdes volledig te maak vir hulle dade in die bediening tot opbouing van die liggaam van Die Gesalfde Een

totdat ons almal een sal wees in vertroue en in kennis van die Seun van God, een man, tot die mate van die volgroeiheid van Die Gesalfde Een.

Ons sal ook nie meer kinders wees wat geskud word en gepla word deur elke wind van lering nie; deur die bedrog van mense, wat deur slinksheid beplan om te mislei nie, maar ons is standvastig in liefde sodat alles waarmee ons besig is, mag vermeerder in Die Gesalfde Een, wat die Hoof is en

vanuit Hom is die hele liggaam inmeekaargepas en een gemaak by elke ligament, volgens die gawe wat elke ledemaat na mate ontvang het, vir die groei van Sy liggaam sodat Sy gebou in liefde voltooi kan word.

Volgens vers 11 is dit duidelik dat YHVH self hierdie verandering aan Torah ingestel het, naamlik die vyf bedieninge *om die afgesonderdes volledig te maak vir hulle dade in die bediening tot opbouing van die liggaam van Die Gesalfde Een totdat ons almal een sal wees in vertroue en in kennis van die Seun van God, een man, tot die mate van die volgroeiheid van Die Gesalfde Een.*

Die Vyfvoud Bediening (Efes. 4:11 tot 14) is YHVH se regeringstruktuur van die nuwe verbond en die Gawes van die Afgesonderde Gees is die wyse wat die dissipels (priesters) bemagtig word (1 Kor. 1:7 tot 10).

Die priesters (dissipels) van die Melgisedekorde het dus verskillende bedieninge. Daar is apostels, profete, herders, evangeliste en leraars. Die een was egter nie belangriker as die ander nie en hulle het mekaar voorgestaan in eer betoon. Maar daar was wel 'n apostel wat die leier was soos ons sien in Hand. 15:1 tot 22, veral verse 13 en 22; asook Hand. 21:8 waar ons sien dat Jakob erken was as die leier. Onthou: Volgens Torah is 'n leier iemand wat ander dien, want Yeshua het gekom om te dien en nie gedien te word nie.

Kortliks is die taakomsywing van die vyfvoud bediening soos volg:

- Apostels is die leiers en hulle taak is om te organiseer en te koördineer, asook om uitspraak te lewer (beslissing te maak) aangaande Torah. Hulle moet deeglik in Torah onderrig wees en die stem van YHVH duidelik kan hoor! Apostels kan vergelyk word met die regters soos YHVH Moses beveel het om aan te stel (Deut. 16:18). Die apostels moet onderling aan mekaar onderdanig wees. Die opsigters volgens Deut. 16:18 kan ook vergelyk word met die ouderlinge.
- Profete gee ondersteuning aan die apostels, maar waarsku, tugtig en bemoedig ook. Hulle moet die stem van YHVH duidelik kan 'hoor' en ook die stem van YHVH wees. Profete kan beskou word as die 'kwaliteitskontrolle' bediening wat alles volgens YHVH se skietlood meet. Profete en Apostels is dikwels nie baie gewild nie, want deel van hulle taak is om te waarsku en te tugtig en om orde en dissipline te handhaaf.
- Evangeliste "werf" nuwe volgelingen. Hulle is die 'mondstuk' van die gemeente wat die goeie nuus van die evangelie verkondig. Hulle is die 'mediese korps' in die oorlogsone. Evangeliste kan ook as die 'bemarkers' (bemarkingsafdeling) beskou word.
- Herders (Pastore) is verantwoordelik vir die versorging van die gemeente (Grieks: *ekklesia*; Aramees: *adat*; Hebreeus: *kahal / kehillat*), naamlik van die wat uitgeroep en afgesonder is deur YHVH en op gereelde basis bymekaar kom en saam as eenheid funksioneer. Hulle ontvang die nuwelinge wat deur die evangeliste na die gemeente gebring word. Herders, met hulle eggenote, is die geestelike ouers van die gemeente wat elkeen 'opvoed' tot geestelike volwassenheid.
- Leraars is verantwoordelik om nuwelinge, asook die gemeente te leer. Hy is die herder se hulp om die gemeente in die waarheid te onderrig, dwaling te bestry, verkeerdhede reg te stel en die regte lewenswyse te kweek sodat elkeen volkome toegerus kan wees vir elke goeie daad in die diens van YHVH kan staan.

Opgesom:

Bediening	Taak
Apostel	Leierskap; Rigting; Orde, Dissipline
Profeet	Ondersteunend, waarsku; tugtig.
Evangelis	'Wurf' nuwe volgelingen
Herder	Geestelike ouers; versorging
Leraar	Dra kennis oor

Die Skrifte van die hernieude verbond, veral Handelingen, is die bewys dat die apostels as eenheid (eendragtig) in die evangeliebediening van Yeshua gefunksioneer het. Die wyse wat hulle georganiseer was en gefunksioneer het, was die mees effektiewe wyse om Yeshua se opdrag in Matt. 28:19 en 20 om dissipels van alle nasies te maak en om te leer om alles te onderhou wat Yeshua hulle beveel het, suksesvol uit te voer.


Ouderlinge en Diakens

Gedurende die eerste eeu was die hoof van 'n sinagoge meestal 'n Rabbi. So het dit dan gebeur dat so 'n hoof van 'n sinagoge saam met die gemeente tot geloof in Yeshua Messias gekom het.

En Crispus, die hoof van die sinagoge (bymeekaarkomplek), het met sy hele huisgesin in ons Meester geglo; en ook baie van die Korinthiërs het, toe hulle hom hoor, gelowig geword en is gedoop. Hand. 18:8.

In dorpe waar dit nie gebeur het nie, het die apostels dan ‘n gemeente gestig (‘geplant’) onder die beheer en toesig van ‘n raad van ouderlinge. Die Hebreeus vir ouderling is *zakan* en die letterlike betekenis van die woord is: *bebaarde man*. ‘n *Zakan* se funksie was veelvoudig, maar sy fokus was om die gemeente na die beste van sy vermoë geestelik en fisies te versorg en om toe te sien dat die vyfvoud bediening en die gawes van die Afgesonderde Gees ordelik sal funksioneer (1 Kor. 14:40). Vir die doel is hy bygestaan deur diakens. Ouderlinge het dus ook die rol vervul van regters (*shoftim*) en diakens ook die rol van opsigters (*shotrim*).

Die Torahregering en wyse van funksionering van die priesterorde van Melgisedek en van die gemeentes van die nuwe verbond kan skematies soos volg verduidelik word.



Bepeins of Bespreek

1. Ten opsigte van die laaste 40 jaar (ongeveer vanaf die begin van Yeshua se bediening) tot die vernietiging van die tempel is die volgende in die Babiloniese Talmud geskrywe: *"Our Rabbis taught: during the last forty years before the destruction of the Temple, the lot for the Lord (on Yom Kippur) did not come up in the right hand; nor did the crimson-colored strap become white (on the neck of the scapegoat); nor did the western-most light shine; and the doors of the Hekal (Temple) would open by themselves."* [Babylonian Talmud, Yoma, 39b]. Hierdie is tog duidelike bevestiging dat Yeshua die begin is van die priesterorde volgens Melgisedek en dat Yeshua die versoening ('Yom Kippur') is.
2. Deur vertroue in Yeshua as die Messias is ons die nageslag van Abraham en deel van die ware Israel. As Israel (verenig; eensgesind) kan ons net een koning en een hoofpriester met net een priesterdom wees! Maar Rabbynse Judaïsme erken nie Yeshua as Koning en Hoëpriester nie! Dit beteken dat indien die derde tempel gebou word gaan daar twee hoëpriesters en twee priesterdomme wees! aan watter hoëpriester gaan jy onderdanig wees?
3. Rabbynse Judaïsme verklaar profesie slegs volgens die inhoud van die Skrifte van die ou verbond. Daarom sal daar wesenlike verskille wees tussen gelowiges van die nuwe

verbond en Rabbynse Judaïsme ten opsigte van die verklaring van profesie. Ons moet die gevaar hiervan ook beseef, want dit kan aanleiding gee dat ons vir die waarheid verblind word.

4. Is groepies wat Torahstudie doen (Messiaanse huisgemeentes) die uitvoering van die groot opdrag in Matt. 28:19 en 20? Is sulke byeenkomste om volgens YHVH se Torahregering te funksioneer?

-o-o-o-o-o-o-o-o-

Ontvang YHVH se Woord met welwillendheid, maar ondersoek self die Skrifte of hierdie dinge die waarheid is (Hand. 17:11).

Shalomgroete.

Johan.

Epos: kontak@nuwelielied.info

Webwerf: <http://www.nuwelielied.info>

Kopieë mag gemaak en gratis versprei word, maar mag nie verkoop word nie. Geen veranderinge mag aan die oorspronklike teks aangebring word en dit dan onder die naam van Nuwe Lied Bediening versprei nie.